



Ina bella summa per sia victoria retschaiva er Wendy Holdener, la campiunessa mundiala da la cumbinaziun.

FOTOS MAD

Bellas summas!

San Murrezzan 2017 ed ils premis

DA GION NUTEGN STGIER / ANR

■ Per ina giada avain nus oz dapli cifras en connex cun ils Campiunadis mundials da skis. Uschia surveg in victur ubain ina victura 48 000 francs per ses success. L'organisaziun, quella custa 65 milliuns francs e senza ils numerus sponsurs fiss strusch pussaivel da manar tras in occurrenza uschè gronda. Da la partida a San Murrezzan è bunamain 600 atlets ed atlets che derivan da 76 naziuns. Tantas naziuns n'èn anc mai stadas preschentadas tar in Campiunadi mundial da skis e quai dapi il 1934. Nizzegia il contingent maximal da 24 skiunzas e skiunzs per las cursas han las suandantas naziuns: Austria, Frantscha, Italia, USA e Svizra. Tramess a San Murrezzan be in sportist ubain ina sportista han quels pajais: Aserbaidshan, Bolivia, Brasilia, Columbia, Madagaskar, Kenia e Tonga.

1000 liters color blava

Cunzunt per l'elita da skis è ina participaziun a las cursas er or da la vista finanziaria interessanta. Ina cundiziun resta tuttina e quai è da cuntanscher in plaz da podest. Per ils sis emprims da mintga cursa, tar ils umens sco er tar las dunnas, han ils organisaturs a disposiziun ina summa da 120 000 francs sco premi. Il victur ubain la victura surveg in premi da 48 000 francs, per la medaglia d'argient giascha quella summa tar 30 000 francs e per il terz post retschaiva in skiunz ed ina skiunza mintgamaì 18 000 francs. Grazia a la lavur exemplarica dals



Blera color blava per marcar las pistas vegn duvrada tar ils Campiunadis mundials da skis.

1300 voluntaris funziuna tut stupent e quai er en il territori da las cursas. Intgins da quels voluntaris èn er responsabels per marcar las pistas cun color blava. Durant ils Campiunadis mundials da skis ins dovra 1000 liters color blava per segnar las pistas.

Passa in milliun aspectaturs

Buna lavur presta a San Murrezzan er il team dad SRF ed en spezial l'equipa da

la televisiun. Grazia als maletgs impressiunants daventa mintga cursa er ina vaira tensiun cun seser a chasa davant la televisiun. L'interess dal public da la Televisiun Svizra per las cursas è lura er grond.

La cursa rapida da las dunnas ha atratg l'interess da 945 000 persunas a la televisiun e quella dals umens passa in milliun aspectaturs. Quia è ina quota da 78,5%.

Grond interess da las scolas

San Murrezzan 2017 e las scolas

DA GION NUTEGN STGIER / ANR

■ In'acziun ch'è in vair success per ils organisaturs dals Campiunadis mundials da skis è er quella cun las scolas. A l'entschatta da quest onn ha il comité d'organisaziun envidà las scolas grischunas ed er quellas da chantuns ordvart il Grischun da vegnir a San Murrezzan per guardar las cursas da skis a la Corviglia. Cun excepziun da las cursas da la fin d'emna han las scolas pudì tscherner tge

di da l'emna che va il pli bain per far l'excursiun a San Murrezzan als Campiunadis mundials da skis. S'annunziadas èn la fin finala 72 scolas cun in total da 3600 scolars e scolaras. Da quella cifra èn lura 90% uffants da scolas grischunas ed il rest deriva da noss chantuns vischins e da la Svizra centrala. Nizzegia la chaschun da quella offerta gratuita dals organisaturs han cunzunt las scolas engiadinaises, dal Grischun central e da Cuir e cunturn.



Allez la France! Quai conferman ils scolars da la scola da Zuoz.

FOTO G. N. STGIER

Dimensiuns er tar il traffic

■ (anr/gns) Tar mintga cursa dals Campiunadis mundials da skis è er bler traffic sur il Pass dal Güglia. Cunzunt la davosa fin d'emna èn ids sur il pass uschè bles autos sco darar. Da venderdi fin e cun dumengia passada èn gist 28 099 autos passads il Pass dal Güglia en ina u l'autra direziun. Il traffic sur il pass ha cunzunt cumenzà venderdi vers saira cun charrar 5978 autos en direziun Silvaplauna e

2567 autos en direziun Casti. La sonda èn lura charrads 5819 autos en direziun sid e 4176 en direziun nord. La dumengia è il traffic da Silvaplauna en direziun Beiva lura stà pli grond che cuntrari. 6337 autos èn charrads da l'Engiadina en Surses e 3222 viceversa. Senza Campiunadis mundials da skis charraschan en media radund 3000 autos per di sur il Pass dal Güglia.



Il parcadi a Champfèr è adina fitg bain occupà, cunzunt vers la fin da l'emna. FOTO G. N. STGIER

■ FOTO DAL DI

Oz stattan auters sin il podest

(anr/gns) Ier mesemna n'han gi lieu naginas cursas da skis a la Corviglia. Cun esser tar ils Campiunadis mundials da skis il di da paus è er betg vegnì cum battì per aur, argient e bronz. Pia èsi vegnì tar nagina rangaziun, dentant avain nus tuttina chattà in motiv che simbolisescha almain trais skiunzs che stattan sin il podest.

Tge skiunzs che quels savessan esser laschain nus lura avert. A l'ur da la vischanca da Silvaplauna fan intgins umens da naiv parada amez il lai schelà ed attiran uschia l'attenziun da bles che van a San Murrezzan per guardar las cursas.



Trais umens da naiv per ina giada sin il podest e na skiunzs ubain skiunzas. FOTO G. N. STGIER

Attenziun cun cumprar bigliets

■ (rtr) Ils bigliets per eveniments gronds da sport u concerts èn dumandads. Uschia actualmain era per il Campiunadi mundial da skis a San Murrezzan. Ma igl è dad esser precaut nua ch'ins cumpra ils bigliets. En la rait chatan ins inqual portal che porscha bigliets per il Campiunadi mundial da skis. Sco quai che RTR è vegnì a savair han pliras persunas cumprà bigliets sfalsifitgads e pajà ina summa enorm auta per quests bigliets. In um ha ditg ch'el haja cumprà online bigliets da tribuna per ina pulita summa. Cura ch'el eria tar l'entrada ha-

jan ils controlladers alura ditg che quests bigliets na sajan betg valaivels per la tribuna. El dastgia mo ir a l'arrivada sper la tribuna. Gianluca Rossi, responsabel per ils bigliets al Campiunadi mundial da skis a San Murrezzan: «Tgi che less far la segira cumpra bigliets mo sin la pagina uffiziala.» Rossi enconuscha quels portals. Perquai cusseglija el da betg cumprar bigliets simplamain en l'internet. «Tgi che less anc ir spontan a guardar ina cursa duai cumprar ils bigliets via la pagina uffiziala dal campiadadi mundial.» Quai saja la via la pli segira.